

p. 14


I

---

A V R O Y,  
ET A NOSSEIGNEURS DE  
son Conseil.

4  
**S**IRE,

ANDRE' VALLADIER Aumosnier & Predicateur ordinaire de vostre Majesté, Abbé de l'Abbaye de saint Arnoul de Mets, fondée par les Roys vos predecesseurs, remonstre tres-humblement à vostre Majesté, que plusieurs grands & puissants ennemis, pour luy oster son Abbaye de laquelle il auoit esté canoniquement pourueu, & en icelle agréée par vostre Majesté auroient fait diuersement, mesme extraordinairement proceder contre luy en la ville de Mets par feu vostre President le sieur de Selue, bien qu'il n'eust aucune iurisdiction sur le suppliant, lequel l'auroit expulsé de fait de son Abbaye, y mis d'autorité priuée des œconomes ses anciens Moines, & iceux créés administrateurs, luy viuant, tant au spirituel qu'au temporel, de sorte que s'en estant venu plaindre à vostre Conseil, & apres y auoir plaidé & fait plaider contre lesdits de Selue, & autres ses parties, toutes les susdites procédures tant criminelles qu'autres, & tous les differends meus ou à mouuoir concernans ledit suppliant, & son Abbaye, auroient esté renuoyées contradictoirement, premierement à la quatriesme Chambre des Enquestes du Parlement, par Arrest dudit Conseil du 27. Aoust l'an 1616. & du depuis à cause des parentages qui se trouuerent en ladite Chambre, euoquées & de nouveau renuoyées en la deuxiesme Chambre, par autres diuers Arrests du mesme Conseil donnez avec lesdites parties le 9. 17. & 30. Ianuier 1617. avec expresses deffenses à tous autres Iuges d'en cognoistre, en





attribuant toute Cour & Iurisdiction à ladite deuxiesme Chambre: en laquelle par autre Arrest du premier iour de Septembre, de la mesme année tous lesdits differends auroient esté retenus, & ensemble par autre Arrest du trente-vniesme Aoust mil six cens vingt, en plaidant, & sur le plaidoyé de feu Monsieur Seruin pour Monsieur le Procureur General de vostre Majesté, & les conclusions par eux prises toutes en faueur & à la iustification dudit suppliant, les parties auroient esté appointées au Conseil: & cependant par tous les susdits Arrests tant du Conseil que de la deuxiesme Chambre, il auroit esté remis dans ses biens, & main leuée à luy faite de toutes les saisies & annotations faites sur iceux par conspiration desdits malueillans. Au preiudice dequoy avec tant d'arrests en main ledit suppliant contraint de sortir de Paris, tant à cause de l'extreme necessité, pour n'auoir peu iouyr d'un seul obole de son Abbaye cinq ans durant, que pour y auoir esté par leurs menées interdit de la Predication, au moyen de laquelle il pouuoit encore subsister, s'estant allé presenter à Mets pour faire executer les susdicts Arrests du Conseil & se remettre dans sa maison, accompagné d'un des Gardes Escossoises du Corps, avec pouuoir d'Exēpt George de Ramezay, & d'une puissante Sauuegarde de vostre Majesté, ledit suppliant fut chassé avec ledit Exempt, & ses Arrests foullés aux pieds, par Ordonnance cy iointe du feu sieur Bonnouurier commandāt en la ville de Mets, mesme couru par le Lieutenant du Preuost & ses Archers, qui s'estoient mis en deuoir de l'aprehender & le perdre, ainsi qu'il paroist par les procez verbaux dudit Ramezay, du Lieutenant du Preuost, des Huissiers & autres pieces icy attachées: de sorte que le pauvre suppliant reduit à l'extreme necessité, & ne sçachant plus où se tourner, fut contraint de se refugier en Lorraine pour y auoir encore quelques villages au moyen desquels il pourroit viuer, ou estant il fut tellement oppressé, & spolié tout à fait du costé de Mets, cheuallé & circonuenue par toutes sortes de dols artifices & nouuelles violences par les Officiers du sieur Conte de Vaudemōt, qu'il fut contraint luy passer procuration en faueur du sieur Nicolas François



de Lorraine son fils, nommé à l'Euesché de Toul pour luy faire passer en Cour de Rome la coadiution de ladite Abbaye sous l'esperance d'estre assisté de luy contre tant d'oppressions & de violences, & par son moyen de pouuoir iouir de son biē, ainsi qu'il paroist par ladite procuration cy iointe, & que ledit sieur Conte de Vaudemont luy auroit solennellement promis, mesme de luy donner l'Euesché de Toul en eschange venāt à vacquer, de laquelle ledit sieur son fils auoit des ja obtenu la reserue en Cour de Rome. Mais le pauvre suppliant fut bien frustré de ses esperances, car au lieu de faire passer vne simple coadiution, suiuant sa procuration, ledit sieur Conte de Vaudemont par surprises, fraudes, & supercheries, & à force du credit qu'il auoit à Rome, fit passer ladite coadiution par forme d'accès, comprenant vne pure resignation, avec reserue au suppliant, sa vie durant, de tous les fruits, du tiltre, du nom, de toute iurisdiction, disposition & gouuernement tant au spirituel qu'au temporel; avec clauses, non pas comminatoires, mais priuatiues, comme elles sont tousiours sous l'estenduē des païs du Concordat germanique, & deffenses audit sieur Conte de Vaudemont, comme administrateur des corps & biens dudit Nicolas François son fils, & à sondit fils de ne s'ingerer ou entreprendre en façon quelconque, en tout, ou en partie, directement ou indirectement, par soy ou par autrui, sous iuste ou iniuste pretexte, ou par quelconque autre façon que ce soit, contre la personne, biens, droicts, iurisdiction, & autres choses susdictes, à peine de deschoir, *ipso facto*, & sans plaider ou contester, de ladite coadiution ou accez, & de demeurer toutes choses comme non aduenues, ainsi qu'il paroist par les Bulles de reserue cy attachées. Au preiudice de toutes lesquelles choses ledit sieur Conte de Vaudemont & son fils non contens d'auoir manqué à toutes leurs promesses, violé lesdites Bulles, expulsé de fait par des voyes incroyables, le suppliant de son Abbaye, voulu liurer sa personne à ses ennemis, & attenter contre icelle en plusieurs manieres desquelles il fera paroistre en temps & lieu, par pieces irreprochables, ledit sieur Conte de Vaudemont & son fils voyans bien



que tel accès obtenu en sa faueur en Cour de Rome estoit prodigieux, non ouy, & detesté par tous les concordats de France, & de la nation Germanique, par tous les saint De-crets & constitutions des Papes, Conciles generaux, signam-ment de Latran, & de Trente, & qui plus est par les droicts du Royaume, Arrests & Reglemens des Parlemens, & Cours souueraines, & ne pouuoit subsister, & que de fait le sup-pliant se voyant oppressé sous leurs violences s'estoit porté pour appellât, cōme d'abus dudit accez, & releué son appel cy attaché, à la deuxiesme Chambre des Enquestes, en suite de tant d'Arrests de vostre Conseil, & bien aßeurez qu'à la pre-miere audience ledit accez seroit cassé, annullé, mis au neant & detesté, ils s'aduiferent d'une autre artifice indigne d'une ame Chrestienne, pour luy raur de force son Abbaye, laquelle ils ne pouuoient esperer autrement. Car ledit sieur Conte de Vaudemont, & son fils desbaucherent de ladite Abbaye vn feu Iacques Dom-Petre Moine apostat relaps, desia du temps du feu predecesseur Abbé Messire Charles de Senne-ton, & ledit Dom-Petre decedé pour le luy subroger, vn Sebastien Floret le ieune qu'ils firent sortir de la ville de Mets en habit de soldat, les refugierent & retirerent, & entretin-drent de toutes choses, en la ville de Nancy, où ils ont touf-jours esté logez dans des cabarets, & maisons seculieres, va-gabonds & apostats, & sous le nom desdicts Floret & Dom petre, comme partie formelle, au preiudice de tant de renuois faits en la deuxiesme Chambre par le Conseil, & de tant d'au-tres Arrests de retenuë, & d'appointement de ladite Cham-bre, se pourueurent contre le suppliant en Cour de Rome pour faire informer des mesmes faits & differens desquels ils le voyoient iustificié en ladite deuxiesme Chambre, hormis qu'ils y en ont adiousté d'autres tous directement contraires à l'auctorité de vostre Majesté: comme d'auoir respondu à vostre Conseil & à vostre Parlement Iuges seculiers, hanté familierement avec ceux de la Religion pretenduë à Mets, mis au iour l'Auguste Basilique, & vn factum au Parlement qui ne contiennent que les grandeurs, fondations & autho-ritez de nos Roys vos predecesseurs, & la iustification du



suppliant; dégradé ses Bois, laissé aller en ruine ses maisons, foulé & violenté ses subjets, engagé son Abbaye, & aliéné les biens d'icelle, desquels faicts, bien que notoirement calomnieux, ensemble des autres impostures, la Cour estoit, & est encore saisie comme dependantes pleinement & nuement de l'autorité de vostre Majesté, & en tant que Roy & souverain Seigneur de Mets, où est scituée ladite Abbaye, & en tant que fondateur de ladite Abbaye, ledit sieur Conte de Vaudemont & son fils, sous le nom desdits Moynes apostats, ayans fait faire vne information, en la ville de Nancy, par feu Maistre Pierre Rozé, Benedictin natif dudit Nancy, Abbé de saint Arry de Verdun tout seul, les officiaux de Toul, & Verdun n'ayans voulu entendre à cette procedure, & ce aux diligences d'un homme de paille, miserable & chetif Notaire habitant de Nancy nommé Viriony, qu'ils auoient fait Fiscal à leur poste, chez lequel ont tousiours logé lesdits Moynes, & sous Collot Greffier Notaire comme domestique dudit sieur Conte, les tesmoings tous ses domestiques, où subjets, ou tirez a poste dudit Nancy, & du Pontamousson, & payez notoirement, apres leur pretendue audition par ledit sieur Conte de Vaudemont, ce qu'estant venu à la cognoissance du suppliant il se seroit porté aussi pour appellant comme d'abus tant de l'execution du rescrit & commission, que de la pretendue information & de tout ce qui s'en estoit ensuiui, releué son appel icy attaché en ladite Cour, à ladite deuxiesme Chambre où il auroit fait intimer lesdits Dompetre, Floret, & Rozé, & contre eux obtenu default aux presentations à faute de comparoir: ce neantmoins au preiudice de ce lesdits sieur Conte de Vaudemont & son fils, pretendans encore auoir obtenu de M. Octauian Courfin Archeuesque de Tharse pour lors Nonce pour le feu Pape Gregoire X V. vn decret, & mandement decerné en cete ville de Paris, dans l'Hostel de Clugny, le 24. Mars 1623. par lequel ils pretendoient qu'il a donné pouuoir d'arrester le suppliant prisonnier, & le faire conduire sous bonne & seure garde en la ville de Rome, pour luy faire son procez sur lesdites informations, & cependant estably & economies sur



son Abbaye, le Prieur Cloistral de son Abbaye, Benedictin, l'Official de Mets, & vn de la part dudit sieur Conte de Vaudemont, & son fils: attentat, insupportable: mesme ce qui surpasse toute ingratitude, & inhumanité, pour circonuenir la Religion & pieté de vostre Majesté, lesdits sieurs Conte de Vaudemont, & son fils, le mois de Ianuier dernier passé au- roient enuoyé en cette Cour & aposté ledit Sebastien Floret, Moyne, lequel sans autres sollicitateurs que les Agens de Lorraine, & Monsieur le Nonce du Pape, qui est à present, avec autres recognus ennemis du suppliant, auroit présenté les susdites pretenduës informations à vostre Majesté & à son Conseil, par les mains de Monsieur du Chastellet, Maistre des Requestes, & faicts tous leurs efforts d'auoir pareatis, d'aprehender par tout ledit suppliant en vertu du pretendu decret dudit sieur Coursino Nonce, luy donnans à entendre que c'estoit pour le conduire à Rome: ce que vostre Majesté & son sacré Conseil inspirez de Dieu, auant qu'auoir descouuerte ceste si atroce conspiration, reietta par deux ou trois fois: si que le suppliant absent & pour lors en son Abbaye, vacant au Culte & seruice diuin, & à son estude pour le seruice & gloire de vostre Majesté, de sa Couronne & de l'Eglise de Dieu, ne pensant à rien moins, & ignorant tout ce qui se passoit, en ayant eu aduis, & s'estant venu rendre aux pieds de vostre Majesté, pour sa iustification, par prouidence diuine, rencontra fortuitement dans ses poursuites, & apostasie flagrante, ledit Sebastien Floret en cette ville de Paris, prest à monter à cheual pour s'enfuir derechef en Lorraine, lequel ayant aprehendé & conduit en son logis, & trouué sur iceluy plusieurs pieces iustificatiues de toute la susdite coniuration, & de pleine conuiction, & descouuerte que ledit sieur Conte de Vaudemont avec son fils en sont les seuls & principaux auteurs, en presēta Requeste à la Cour, laquelle ordōna par Arrest du 6. Aueil dernier, en cette année 1626. qu'il luy seroit permis de faire prendre & amener en la Conciergerie du Palais ledit Floret, pour luy ouy, ordonner ce que de raison. Lequel en suite ouy par deuant Monsieur Viole du chemin, & puis par deuant M. Bauyn l'ayné, Conseillers de la Cour,



a recognu toutes lesdites pieces, confessé & aduoté que Monsieur de Vaudemont l'auoit employé, & enuoyé, comme aussi feu Dompetre, premierement en Cour de Rome, & puis en cette Cour, pour la poursuite des susdites procédures, leur auoitourné lettres, sollicitateurs, & argent, auoit payé &ourné les tesmoins à Nancy, & sur tout; encore qu'ils fissent entendre à vostre Majesté, qu'ils vouloient conduire le suppliant à Rome, que leur dessein estoit de le conduire à Nancy pour le perdre; mesme l'aprehender par tout, sur le decret dudit sieur Nonce, en cas que vostre Majesté en refusast le pareatis. Tous attentats nullement supportables, & qui paroissent par lesd. pieces recogneuës par ledit Floret, & par ses auditions icy iointes. Sur laquelle descouuerte s'adressant derechef le suppliant à la Cour, la suppliant qu'il luy pleust le receuoir appellant, en adherant à ses premieres appellations comme d'abus desdites pretenduës informations, decret, ordonnance, commission ainsi decernées, & de tout ce qui s'en estoit ensuiuy: ladite Cour par Arrest cy ioint, du 22. Aueil dernier de cete année 1626. auoit receu le suppliant appellant, adherant à ses premieres appellations comme d'abus desdites pretenduës informations, decret, ordonnance, & commission, l'auoit tenu pour bien releué, & luy permis faire intimer ledit Floret, & tous autres, qu'il appartiendroit, & cependant iusques à ce que par ladite Cour autrement en eust esté ordonné, défenses à tous Huissiers, Sergés & toutes personnes d'exécuter lesdits decret, à peine de deux mil liures d'amende, cassation, reparation, despens, dommages & interests, Ordonné en outre que commandement seroit fait audit Floret de faire mettre au Greffe de ladite Cour lesdites pretenduës informations, pour icelles veuës, & rapportées, communiquées à vostre Procureur General, & luy ouy, ordonner ce que de raison; sur lequel Arrest auoit aussi esté expédiée par vostre Conseil commission au grand sceau cy iointe, pour l'exécution d'iceluy, & le suppliant fait intimer ledit Sebastien Floret prisonnier, lequel en ses auditions s'estoit déclaré partie, & porteur desdites pretenduës informations pour venir respōdre,



& plaider sur icelles, lequel n'en ayant tenu compte, au grand mespris de l'autorité de vostre Majesté, & des Arrests de son Parlement, sur ses noncomparoissances, & deffauts, seroit interuenu autre Arrest en ladite Cour cy attaché du 8. Aoust dernier, par lequel toutes les susdites procédures & pieces recogneuës par ledit Floret, avec ses auditions veuës, avec les conclusions de Monsieur vostre Procureur General, auroit esté dit PAR LADITE COUR, que lesdits deffauts ont esté bien & deuëment obtenus, & pour le profit d'iceux, qu'il auroit esté mal, nullement, & abusiuement procedé, decretté, & ordonné, & partant auroit ladite Cour, cassé & reuoqué les Decrets, procédures, & tout ce qui a esté fait contre ledit Valladier suppliant, COMME ATTENTATS CONTRE LES SAINCTS, DECRETS L'AUTHORITE DE VOSTRE MAIESTE', ET LIBERTE' DE L'EGLISE GALLICANE, avec defences tant audit Floret qu'à tous autres de s'en ayder, & à tous Huissiers & Sergens de les mettre à execution, à peine de dix mille liures d'amende contre les contreuenans, & d'estre procedé contre eux extraordinairement, & de tous despens, dommages & interests : ledit Floret condamné aux despens dudit defaut, & de ce qui s'en est ensuiui.

**M**AIS par ce que ledit suppliant ne peut plus supporter l'ingratitude, & continuels attentats desdits sieurs Conte de Vaudemort & son fils, cōtre sa personne, ses droits & ses biens: attendu mesmement qu'ils luy detiennent, il y a sept ans, tous ses reuenus qui sont hors du pays Messin, montans à plus de sept mille liures de rente, sous des pretextes friuoles, & iniustes, & sans forme aucune de iustice, bien que le suppliant ne leur doie rien, ayans par ce moyen causé la ruyne de ladite Abbaye, bien esloignez de la soulager, ainsi qu'ils l'auoient promis, & en estoient obligez, ledit suppliant desireux & contraint d'obuier à la desolatiō totale de la pauvre Abbaye, & remedier à la faute qu'il a faite biē que par cōtrainte & necessité ineuitable, & par diuerfes fraudes & artifices desquels il fera paroistre, de leurs officiers, d'auoir passé cette sorte de coadiutiō simulée & inaudite de lad. Abbaye, & estant



estant de soy notoire qu'encore qu'elle ne puisse subsister, & soit detestée & reprouvée par toutes les loix diuines, & humaines; & mesme quand elle seroit tres legitime & approuvée, ce que non, que lesdits sieurs Conte de Vaudemont & son fils, s'en sont rendus indignes & du tout incapables, par le moyen de ce dernier attentat contre la vie & l'honneur du suppliant, qu'ils ont voulu perdre, sous pretexte d'icelles pretenduës informations, s'estant derechef adressé à la Cour, sur le mespris dudit Floret d'obeyr, & de les remettre au Greffe, pour y estre contraint par toutes voyes deuës & raisonnables, & lesdits sieurs Conte de Vaudemont & son fils assignez pardeuant ladite Cour, pour y venir respondre & plaider tant sur la cassation desdites pretenduës informations, & autres procedures avec ledit Floret, que sur la cassation, & reuocation de l'execution desdites Bulles du pretendu accez, ou coadiutiō, sur les appels comme d'abus sur ce interiectez par le suppliant: la Cour par autre arrest cy attaché, du 23. Iuin dernier passé, auroit ordonné que ledit Arrest du 22. Auril sera executé, & que commandement sera fait audit Floret d'y obeyr, & faire mettre au Greffe de ladite Cour les informations y mentionnées, & iusques à ce, qu'il tiendra prison. Et par autre Arrest cy ioint de la mesme Cour, du 2. de Iuillet dernier, que plaidant par lesdits suppliant, & Floret, lesdits Conte de Vaudemont & Euesque de Toul viendront par mesme moyen plaider sur l'appel comme d'abus, aussi par ledit Valladier interiecté de l'execution desdites Bulles d'accés, & à cette fin que l'assignation & autres exploits qui seront faits en leur Hostel de Lorraine sciz en cette ville de Paris, tiendront, & seront de mesme effect, force & ve tu comme s'ils estoient faits à leurs personnes. Par ce aussi qu'il y auoit eu traitté, & procuration passée par le suppliant extorquée par artifices & voyes extraordinaires par ledit sieur Conte de Vaudemont à l'effect de ladite coadiutiō, il auroit sur ce, pour s'en releuer, obtenu de vostre Majesté des lettres cy attachées, à l'effect dudit appel comme d'abus, le 29. Iuillet dernier passé.



**Q**VOY CONSIDERE' SIRE, & que le moyen infailible de casser ledit accès ou coadiution de ladite Abbaye, pretenduë par le sieur Conte & son fils, nommé à l'Euesché de Toul, est la susdite information avec la detention dudit Sebastien Floret, qui n'est assisté & sollicité en prison, au conseil, & ailleurs, que par les Agens & Solliciteurs dudit sieur Conte de Vaudemont, comme luy ayant seruy de principal instrument de cette conspiration tramée, non tant contre la personne & biens du suppliant, que contre vostre autorité, & Majesté, contre les Concordats, droits & loix du Royaume, & libertez de l'Eglise Gallicane: & que lesdites pretenduës informations, lesquelles ledit Floret prisonnier est condāné par Arrest de mettre & rapporter au Greffe de la Cour, & a déclaré icelles estre es mains de Mōsieur du Chastellet, Maistre des Requestes: cōsideré aussi que la cassation & reuocation dudit pretendu accès est tellement importante au seruice de vostre Majesté, qu'un Gouverneur de Mets, malaysément pourra respondre de cette ville & gouvernement, & ne se pourra remedier à telle playe de long temps, & sans grandes, & fascheuses difficultez, si cette Abbaye si importante, demeure en Lorraine: attendu sur tout, que l'ardeur, & violence incroyable, qu'a apporté & apporte ledit sieur Conte de Vaudemont à l'auoir, par toutes voyes estranges, & extraordinaires, n'est à autre dessein, que pour la démembrer tout à fait, ainsi qu'ils ont ja fait de l'Abbaye Royale de Gorze, voire mesme de l'Abbaye de S. Arnoul, tellement à leur bien-seance, qu'ils en ont desmembré & aliené plus de quinze, ou seize pieces tres importantes, qu'ils detiennent; mesmes en ont engagé, & voulu vsurper d'autres, depuis ledit acces passé, ainsi que le suppliant fait paroistre à vostre Majesté, par la declaration cy iointe, qu'il auoit desia mise es mains de Monsieur le Bret, Conseiller d'Etat en son voyage de Mets.

**I**L PLAISE à vostre Majesté d'ordonner, conformément aux precedens Arrests de renuoy, que les susdites informations, avec toutes autres pieces & procedures, qui se trouueront entre les mains dudit sieur du Chastellet, ou au-



tres, seront remises & rapportées à la Cour : avec pouuoir à ladite Cour, en la deuxiesme Chambre des Enquestes de proceder incontinent à la cassation desdits acces, ou coadiution, tant sur lesdits appels comme d'abus, lettres de relief, pretenduës informations, & auditions dudit Sebastien Floret prisonnier, qu'autres pieces produites, ou à produire, par ledit suppliant, de ce donnant toute Cour & Iurisdiction à ladite deuxiesme Chambre des Enquestes, avec deffences à tous autres luges, de quelque qualité qu'ils soient, d'en cognoistre: si fera vostre Majesté iustice, & obligera le suppliant de continuer à prier incessamment, de plus en plus, pour sa grandeur, gloire, & prospérité.











## AV ROY.

ET A NOS SEIGNEURS DE SON  
*Conseil.*

IRE,

**S** REMONSTRE tres-humblement à vostre Majesté André Valladier vostre Aumosnier, & Predicateur ordinaire qu'il auroit esté enuoyé en la ville de Mets, par election particuliere, pour servir de Vicaire general, Predicateur & Theologien, à feu Monsieur le Cardinal de Giury, Euesque dudit Mets, il y a sept ou huit ans, par Henry le grand, de glorieuse memoire, vostre tres-honoré pere, avec lettres tres-expresses de singuliere recommandation, au sieur de Requiem, son fidelle serviteur, pour lors commandant en la Citadelle, & d'autres au Chapitre de la Cathedrale, & au sieur de Selue, commis pour la iustice audit lieu, & à tous ses autres officiers Royaulx, mesmes avec marques particulieres pour son service, dequoy vostre Maiesté sera esclaircie par Monsieur de Geure, vostre Secretaire d'Estat, qui en fit les despesches. Depuis ledit Valladier n'a obmis aucune occasion de le porter avec toute sorte de passion à vostre service, de tout son petit pouvoir, & d'y travailler à l'advancement de la Religion Catholique, avec vn succez assez remarquable, & notoire à toute la Prouince, en la conuersion d'un bon nombre des desuoyez; mesmes tesmoignes par les attestations signalees de tous les estats de la ville de Mets, desquelles il fera paroistre en temps & lieu. Si bien que l'Abbaye de saint Arnoul, de fondation Royale, tres-ancienne & remarquable. Venant à vacquer, il auroit esté esleu Abbé, lors que moins il y pensoit, election trauersee, & icy en vostre





Conseil, & à Rome, plus de trois ans entiers, par des artifices admirables, iusques à la ruine presque totale de cette pauvre maison engagée auparavant de plus des deux tiers de son reuenu, distraicts, & detenus iniustement & par la pluspart des Citoyens & Magistrats de Mets. Quoy nonobstant il a esté maintenu enuers tous, & contre tous en son election long tēps y a, par la grande equité de sa Sainteté, & par vostre Majesté & son Conseil, & par le bien faict special de la Reyne, vostre tres-honoree Mere, sous laquelle autorité, & protection, il a desja remis vne bonne partie des biens alienez en ladicte Abbaye, & tasche par tous moyēs de la remettre en son entier, & d'aduancer en tout ce qu'à luy touche le seruice de Dieu, & l'autorité de vostre Majesté son fondateur, en ladicte ville, laquelle y a esté iusques icy tellemēt foulee, & conculquee aux pieds, qu'il ny a bon François ny fidelle sujet de vostre Coronne, qui n'en ayt horreur, & ce par la faction de certains refugiés, & estrangers, ramassez, qu'on designera à vostre Majesté, lesquels parcy deuant ont si cruellement trauersé vos naturels sujets, qu'ils les ont, ou honteusement chassés ou contraincts de s'absenter de leur rage, afin que leurs menees ne fussent decouuertes, de quoy on fera paroistre par plusieurs insignes oppressions, faictes à voz plus zelés seruiteurs & sujets. Mais bien notamment par la Tragœdie, qui se passe auourd'huy en la personne dudit Valladier suppliant, qu'ils ont traicté si indignement & inhumainement, qu'il y a de l'horreur à l'ouyr seulement: ce qu'il se garde à deduire, & à le renuoyer à la posterité & eternité, à autre occasion, pour n'abuser des oreilles Royales, par le recit de choses si odieuses & inusitées parmy les Chrestiens, se contentent pour maintenant de dire, qu'il y a plus de quatre ans, que par toute sorte d'artifice, on l'a voulu despoüiller de son bien, & procuré par tous moyēs de luy arracher son Abbaye, laquelle il a cōseruee, & augmentée avec tant de trauerses & de peine, ne luy ayant donné le loisir de cinq ans qu'il y a qu'il est Abbé, de iouir vne seule année. L'an passé desia, les Magistrats de Metz assaillirent le suppliant si rudement qu'ils violerent tous ses priuileges, profanerēt sa maison Abbatiale, & autres siens domiciles, opprresserent ses subiects, vsurperent la iustice, qui est,



& a tousiours esté independente d'eux , & Regalienne, n'ayans iamais osé controuerfer quel Abbé de sainct Arnoul ne donne grace en toutes ses terres, & ne iuge par tout sans appel, & ne soit aussi absolu seigneur en ses terres, qu'eux en en leur petit ban, qui n'est pas de mille pas de diametre, & qui n'est nullement comparable ausdites terres.

Dequoy se sentant enormement oppresse, & voyant qu'ils se vouloient vsurper vostre souueraineté, il protesta contre eux en leur audience, ou ils l'auoient pressé de se trouver paradiournemēt personnel, d'vsurpation & d'attentat, cōme vostre naturel & tres-obligé sujet qui a presté serment solemnel de fidelité entre les mains du grand Aumosnier de France à vostre Maiesté, comme vostre Aumosnier & Predicateur ordinaire: en appella formellement, & s'en voulut pouruoir à vostre Conseil: mais eux n'ayans iamais rien tant redouté, que de voir leur conspiration contre vostre autorité esclairee, moyennerent par tous moyens que l'affaire se termina pardeuant Monsieur d'Espernon nostre Gouverneur: à quoy le suppliant condescendit d'autant plus volontiers qu'il auoit tousiours recogneu son equité, & son affection toute dressée à vostre seruice, en quoy il ne fut frustré de son attente: car apres auoir pris la peine de recognoistre leurs deportements insupportables: par sentēce arbitraire tres-ēxpresse, il les debouta tout à faict de leur imaginaire souueraineté, cassa & mit au neant toutes les procedures faictes contre luy, contre ses droits, & contre ses biens, les condamna à restablir les despens, & les amendes iniustement imposees, mesmes à tirer de leurs registres & biffer leurs actes & procedures: & en fin s'y comporta en fidele seruiteur de Dieu & de vostre Maiesté, & arbitre tres-equitable. De ceste premiere atteinte, laquelle n'estoit pas petite pour le maintien de vostre autorité, ledit Magistrat de Mets, singulierement les estrangers ramassez entrerent en vne si profonde animosité contre le suppliant, qui n'a iamais demandé que le sien, & defendu ses droicts ioincts inseparablement à vostre souueraineté, qu'ils ne mirent en effect que la moitié du contenu en ladite sentence de monsieur d'Espernon icy ioincte: & du depuis sans reuenue, commencerent à reprendre leurs premieres erres, & à opprimer plus que deuant ses subiects, ses droicts, & sa iurif.



diction, & à releuer de plus en plus le phantofme de leur sou-  
 ueraineté : c'est à dire , de leur vſurpation , de forte que  
 le ſuppliant contraint de fouiller les Archiues de ſon Ab-  
 baye, & trouuant d'un coſté que de tout temps l'Abbé de S.  
 Arnoul, & tout ce qui luy appartient auoit eſte indubitable-  
 ment exempt de toute iuſtice tant Eccleſiaſtique que ſeculie-  
 re de Metz, ſubiet immédiatement au S. Siege & à voſtre Ma-  
 ieſté : & d'ailleurs depuis ſa fondation touſiours ſous la garde  
 gardienne des Roys de France vos predeceſſeurs, ſans reco-  
 gnoiſtre autre ſouuerain ſur ſes terres toutes Regaliennes &  
 francalleux, que leurs Majeſtez leur ſpeciaux & indubitables  
 fondateurs : Meſmes du temps que les Empereurs d'Alema-  
 gne renoiēt mets ſouz leur obeiſſance. Le ſuppliaūt ſe plaignit  
 de nouveau de tels attentats à voſtre Majeſté, & à ſon Con-  
 ſeil, exhiba les originaux de ſes exemptions & immunitéz,  
 avec les patentes tres-anciennes de garde gardienne, de tous  
 les Rois ; toutes veuës, & meurement conſiderees en voſtre  
 dit Conſeil: à quoy eu eſgard, luy furent nouuellement expe-  
 diées autres patentes de garde gardienne, conformément aux  
 anciennes, & ſignamment à celles de Henry le grand, & de  
 François premier, & icelles par le ſuppliant preſentées incon-  
 tinent audit ſieur d'Eſpernon, représentant en ce pays là vo-  
 ſtre Majeſté, qui les fiſt voir avec les anciennes à ſon Conſeil,  
 & apres le rapport à luy fait par le ſieur de Mauroy, perſonna-  
 ge qualifié & homme de bien, declara qu'il n'y trouuoit  
 rien à redire, puis que ce n'eſtoit choſe nouuelle, & que ſa Ma-  
 ieſté y auoit paſſé: adiouſtant ſur la nouuelle plainte à luy fai-  
 cte des reïterees entrepriſes du magiſtrat de mets, que s'ils  
 pourſuiuoient à le moleſter, il trouueroit touſiours bon &  
 raſonnable, qu'ils'en pouruent vers voſtre Majeſté, pour y  
 apporter le remede & reglement neceſſaire, ne ſachant plus  
 qu'y faire, apres y auoir aporté tout ce qui eſtoit de ſon autho-  
 rité de gouverneur. Donc lors du deſpart de voſtre Majeſté,  
 pour ſon voyage de Bourdeaux : Le ſuppliant par comman-  
 dement expreſ de la Reynemere, enuoyé à mets pour voſtre  
 ſeruice, y trouua ſes ſubiets oppreſſez, gemiſſans & criers plus  
 que iamais, ſouz les violences, meſmes impoſts & tailles non  
 iamais ouyes ny attentees, exigees par les treze de mets, & y  
 fuſt receu avec des menaces, atroces du maiſtre Eſcheuin  
 nommé



5  
nommé maghin, son ennemy ouuert & cogneu de tous, principal auteur des attentats de l'annee passée, & le cōducteur de tous les mal affectionnez au suppliant, que si il faisoit mention de sa garde gardiène qu'ils le perdroyent & le ruineroiēt poursuuans cependant de iour à autre leurs vsurpations & oppressions: si bien que le suppliant considerant les nouveaux troubles, de vostre Estat, & la cōdition du tēps, bien que violence de toutes parts, se resolut à vne extreme patience, & profond silēce, & à ne sonner mot de ses lettres de garde gardiène, qu'il teust & supprima opiniastrēmēt, iusques à la nouuelle de vostre mariage diuinement accompli, & de vostre retour, & que solennellement on en eut chanté le *Tedeum laudamus*, sur laquelle nouuelle le suppliant affligé par eux, & poursuuy de toutes parts, se voyant le pied sur la gorge, commença à respirer, & s'adressant au sieur de Selue par requeste, illec commis par vostre maiesté, comme dit est, entre les soldats & les citoyens pour enregistrer lescdites patentes, ainsi qu'il luy est expressement commandé & chargé par icelles, & que par sentence cy jointe, il auoit l'an auparauant enregistré toutes les autres gardes gardiennes anciennes: luy au lieu d'obeir, & de faire son debuoir, esmeu d'extreme regret de voir la cognoissance de ladite Abbaye retenuë à vostre maiesté, & que sa pratique en seroit de plus de la moyté refroidie, le tout remis suuāt les anciennes gardes gardiennes au Baillif & President de Vitry, cōme le plus proche iuge Royal, receut ledit suppliant avec iniures atroces, mēme le poussa, & ietta de sa maison, luy disant avec extreme colere, qu'il sortit de sa maison, autrement qu'il luy feroit mal ses affaires, & y adioustant des autres fallies extraordinaires cōprises au procez verbal cy joint, tres-indignes d'un hōme de sa robbe. Non content de ce, mendiāt, de toutes parts quelque sujet de le troubler, & de s'opposer à vostre volōté Royale, il suscita le Syndic des treze à s'y opposer: & par sentence cy adioincte, luy oōtroya delay de trois mois, pour cependant iōier ses tragedies, & iōindre à ceste sienne premiere animosité d'autres interests qui se verrōt cy apres, à quoy le suppliant s'opposa, protestant de nullité & d'attentat, de tout ce que luy, ou autre attenteroiēt contre sa garde gardienne. Quoy nonobstāt, Sire, la passion & l'interest le porterēt si aduant, que du depuis non.



obstant le delay qu'il auoit ordonné, il contreuint formellement & expressement à tous, & chacun les chefs de ladite garde gardienne, crime enorme de leze maiesté, recogneu en ce cas par tous les Iuriscultes, oppressant violemment, & sans aucune forme de iustice la maison Abbatale, les biens, meubles & immeubles, subiects & seruiteurs, mesme la personne du suppliant, par mille & mille inuentions estranges & non iamais ouyes: voire mesprisant, & oppressant vos Huissiers qu'il auoit mené avec luy pour mettre en execution ladite garde gardienne, & pour autres affaires d'importance.

Premierement, apres la presentation & intimation de ladite garde gardienne, quatre ou cinq iours apres, il enuoye en sa maison Abbatale, & iusques dedans sa chambre & estude, vn sien vallet domesticque qu'il a fait son Huissier nommé Pistre, de vile & abiecte cōdition, & qui a fait, amende honorable il n'y a pas long temps en la ville de Mets, chez lequel le sieur Cardinal de la Rochefoucault, contre lequel le suppliant plaide en vostre Conseil, a esleu domicile: Et partant chez ledit sieur de Selue, soy-disant proche parant dudit sieur Cardinal, & ayant charge pardela de ses affaires, signamment de celle dont il se plaide: lequel Pistre, irrité aussi d'auoir esté debouté par le suppliant de quelque charge qu'il auoit en vne de ses terres qu'il a remises en son Abbaye, avec insolence, present vn de vos Huissiers du Chastelet de Paris, declare qu'il vient de la part du sieur de Selue, de faire des saisies sur tous les biens de saint Arnoul, & qu'il les fait derechef pour la pretendue pension dudit sieur Cardinal, dont le procez est pendant en vostre Conseil: le tout sur vne commission emanée de vostre conseil surannee & cassée par Arrest contradictoirement donné audit conseil, au rapport de mōsieur Mangot: & soy-disant enuoyé neantmoins de la part du sieur de Selue, de laquelle commission il ne voulut donner aucune coppie, voire à grand peine, de son exploict, qu'il fist sans aucun tefmoin, & avec iniures atroces contre l'Huyssier Illec present, & autres insolences insupportables audit suppliant, lequel voyant bien que ç'estoit le commencement de la coniuuration de ses ennemis, ne luy fist autre response, sinon qu'il s'adressa à son Procureur, auquel il auoit donné charge de receuoir semblables exploicts: à quoy ledit Pistre ne vou-



luy entendre, ains redoubla son impudence; bien qu'aduerty par le suppliant, que sa commission estoit surannée, & cassée au conseil, & présentée de la part du sieur de Selue, qui n'y auoit rien que voir, & partant que son exploict estoit nul & faulx, & ses saisies, pour ce regard, abusives, fausses & nulles: ce qu'il luy réitera le mesme iour en presence dudit sieur de Selue, se plaignant à luy de l'insolence de son valet, laquelle incontinent il espousa, au lieu de luy en faire raison, iusques à dire qu'il en feroit son procez verbal, & qu'il auroit sa raison de ce qu'on auoit appelé les saisies de son Pistre nulles & fausses, avec autres menasses & boutades extrauagantes, contenues au susdit procez verbal: & pour couvrir son extreme passion, & ses desseins bien plus estranges desquels on fera paroistre à vostre Majesté; Pistre presente plainte au sieur de Bonnouurier, Capitaine d'une compagnie aux gardes, commandant en la Citadelle de Mets, en l'absence de monsieur d'Espéron, tendent à ce que le suppliant fust cōdemné à réparation d'honneur, pour auoir dit que Pistre auoit mal exploitté. Ledit sieur de Bonnouurier, seruiteur fidele à vostre Majesté, mais qui a esté domestique, nourry & esleué autrefois en la maison dudit sieur Cardinal, & qui a refusé parmy toutes ses oppressions toute sorte d'assistance au suppliant, bien que de ce fort souuent requis en vertu de ses gardes gardiennes, receuë qu'il eut la plainte de Pistre, enuoya vn certain Cornier commis à Mets, en la charge de Preuost Prouincial, lequel accompagné de trois ou quatre de ses Archers, le iour de S. martin, vint en sa chābre Abbatiale sur son disner, où il estoit en cōpagnie de deux ou trois Abbez, de quelques Chanoines, Aduocats, & autres personnes qualifiees, disant ledit Cornier qu'il estoit là de la part du sieur de Bonnouurier, pour sçauoir de luy quel iuge il recognoissoit pour le contenu de la plainte de Pistre, à quoy en trois mots, respondit le suppliant, qu'outre ses propres iuges, qu'il ne pouuoit ignorer, veuë & recogneuë sa qualité d'Abbé, qu'ayant présenté, & intimé sa garde gardienne: & que la plainte de Pistre estant sur vne pretenduë cōmission, emanée du Cōseil Royal, la cognoissance en appartenoit à vostre maïesté, & à son dit Conseil, & partant qu'il ne recognoissoit autres iuges à Mets apres sa saincteté que le Roy (qu'il eseroit neantmoins que le



sieur de Bonnouurier representant vostre Maiesté en l'absence de monsieur d'Espéron, le protegeroit & adfisteroit, ainsi qu'il luy estoit cōmandé par les lettres de garde gardiēne) qui est tout ce qu'il dit, & rien autre, en presence de toute la cōpagnie: le tout esclairey par le procez verbal cy-adioinct. Ce nonobstant le susdit Cornier, que les sieurs de Montigny & D'Arquiem, depaindront à vostre maiesté pour tel qu'il est, avec ses belles qualitez, & outre ce, partie formelle, & ennemy special dudit suppliant, qui s'estoit peu auparauant pleint des extorsions, violences, & concussions, par luy faictes sur ses terres, & subiects: mesme des attentats non iamais ouys, qu'il commettoit flagramment contre la iurisdiction, les droictz, & la iustice de sainct Arnoul, r'alliant ses interests & ses iustes creintes, avec les animositez de ses ennemis, dressa vn procez verbal, qu'il chargea de plusieurs euidentes impostures, menteries, & calomnies (sauf correction) de ce qui s'estoit passé en la chambre Abbatiale, comme s'il se fust trouué sur quelque haut chemin: & nommément qu'il auoit dit qu'il recognoissoit ledit sieur de Bonnouurier pour iuge, qu'il auoit iniurié le sieur de Selue, & offensé derechef Pistre, dequoy le suppliant ne dit iamais aucun mot: suyuant lequel procez verbal controuué, & ainsi falsifié, ledit sieur de Bonnouurier se seruant de la main dudit Cornier, decreta la plainte de Pistre, surpassant ce qui est de sa fonction, & de sa puissance, ordonna qu'il subiroit le iugement du sieur de Selue, & qu'il auoit tramé pour le couvrir de ce manteau moullé: vray indice qu'il n'auoit aucune puissance de mettre en execution ses desseins, s'il n'estoit autorisé du sieur de Bonnouurier, encore plus incapable de cognoistre de telles choses, & vsurpation plus nouuelle de vouloir iuger d'vn Abbé, que si l'Abbé se vouloit ingerer de iuger des soldats, ou de ses Capitaines, ou de luy-mesme.

Donc le sieur de Selue procede contre le suppliant, l'adiourne, le presse de venir respondre pardeuant luy d'iniure, sur la plainte de Pistre, le suppliant decline, & s'oppose: sur ses declinatoires il passe outre, le coutumace, & en fin par sentence cy iointe, le condamne à faire amende-honorable en plain Parquet audict Pistre, aux despens, & à l'amende. Ordonne qu'a faute d'obeyr, il sera contrainct par toutes voyes;



voyes: & defaict enuoyant en la maison Abbaticale de saint Arnoul pour signifier & intimer ladicte sentence, en mesme temps il attiltre tous les Sergens & Huissiers de Mets sans en obmettre vn seul, iusque au nombre de trente & quarante autres recols, & plusieurs crochetteurs avec des ortes, armez de pistollers & carabines, grande iniure à la maiesté Royale, si il eût creu que c'estoit de sa part, assez armee de son nom, principalement contre vn pauvre Religieux desarmé. Ces appariteurs ainsi armés cōme en bataille rangee, proferās mille blasphemés, & iniures atroces contre le suppliant, voire contre vostre majesté, se presentent & cependant tiennent prest vn carrosse a la porte d'en haut de l'Abbaye pour enlever ledit suppliant, & le conduire au parquet, & par force le porter à ceste pretenduë reparation honoraire, de quoy luy ayant esté dōné aduis & qu'en deux portes de la ville on auoit mis des gens pour l'arrester, mesme demandé au sieur de Bonnouurier main forte pour ce faire, ce qu'il ne voulut leur accorder, ledit suppliant fait fermer les portes d'en haut de son Abbaye, se retirant cependant par la porte d'en bas avec son carrosse, & son Huissier du Chastellet, & se rendant en vne siennemaison assez forte du pays Messin: à la mesme heure, ils brisent & enfoncent les portes de l'Abbaye: entrent cuidans le trouuer: frustrez de leur attente, faissent tous ses meubles, cachettent ses coffres, avec vn murmure & scandale esclatant de toute la ville, singulierement de tous les gens de bien, qui gemissent, & pleurent encore de voir ce que les siecles passez n'auoient iamais veu à Mets: vne maison Royale, si sacree, & auguste, violee, profanee, oppressée ce que ceux de la Religion pretenduë mesme detestent abhorrent, & desplorent.

Le sieur de Selue voyant le suppliant hors de ses mains, s'en va assisté du sieur Ioly huguenot fameux, vostre Procureur à Mets, & d'vn autre treize de la mesme pretenduë religion, s'empare du coffre singulier des escrits plus secrets du suppliant, ou estoient les principaux ritres originaux, & fondamentaux de son Abbaye, ses sermons & recueils de ses petits estudes, brisent & enfoncent la serrure, inuentorisent le tout, de quoy voicy l'inventaire ioint. Action SIRE d'extreme immanité non iamais vsitee, qu'en cas de crime de leze ma-



iesté diuine, ou humaine, lesquels deux crimes par ce seul acte enorme il a encouru, avec toutes les censures canoniques, vray object deormais de la iuste vengeance diuine, & detesté mesmement par les loix Imperiales, *Quid enim tam durum & inhumanum est*, disoient les Empereurs Theodose & Valentinian, en parlant d'une bien plus douce recherche de meuble, *quàm publicatione rerum familiarum, aut paupertatis detegi uilitatem, aut inuidia exponere diuitias?*

Cornier d'autre costé poussé de mesme esprit meēt en fait, que le suppliant auoit dit au sieur de Bōnouurier se plaignant a luy de ce qu'il auoit enuoyé vn Preuost avec des Archers en sa maison Abbatale pour faire des procez verbaux, (comme s'il eust esté quelque criminel, & trouué à l'aisle de quelque bois) que ledit procez verbal de Cornier estoit remply d'impostures, & de calomnies controuuees a plaisir: presente plainte d'iniures cōtre luy renuoyee aussi par le sieur de Bonnouurier, audit sieur de Selue, qui la reçoit tres-auidement, procede comme pour Pistre, adiourne le suppliant, le presse, le contumace, le condamne derechef par sentence cy ioincte a faire la mesme reparation en son parquet audit Cornier, & de plus aux despens, & à vne grosse amende.

Et pour voir que c'est vn aduis sans fin, d'animosité, & de passion, en mesme temps le suppliant estant apres à reformer la discipline reguliere dedans son Abbaye, dequoy iusques icy on ne luy a donné aucun loisir, bien que ç'ait tousiours esté, & soit son dessein, & apres auoir reconnu que par le passé, depuis peu d'annees ses Religieux s'estoient laissés couler à vne damnable liberté, de ne faire aucune profession, autre que la prinse d'habit, & voulant obuier à vn si grand mal, ordonna qu'un sien nouice nommé Marquant, paruenue à l'age de Profession, la fit en la mesme forme que luy-mesme, leur Abbé l'auoit faicte, & qu'on la faict par toute la Chrestienté en l'ordre de saint Benoist, à quoy n'ayans voulu obeyr lesdicts Religieux, le susdict Nouice porté par ses ennemis, presente Requête de plainte contre ledit suppliant son Abbé, audit sieur de Bonnouurier, lequel derechef le renuoye audit de Selue, decrette qu'il y subira & respondra. De Selue bien heureux de trouuer nouveau sujet de luy nuire, s'vsurpant contre toutes les loix diuines & humaines, la co-



gnoissance des actions Regulieres, & cloistrieres, mesme d'une personne sacree & exempte de tous Iuges, hormis de sa Saincteté, & de vostre Maiesté: Ayans les Empereurs en tel cas en leurs autentiques, imposees de grandes peines, non seulement priuations de leurs charges, ains autres corporelles, outre les redoutables censures de l'Eglise: nonobstant tout cela, il readiourne ledit suppliant, lequel persistant à decliner, & à s'opposer, il passe outre, le coutumace, le condamne aux despens, & à faute de ne laisser le Nouice viure à l'accoustumée, à luy fournir vingt cinq liures de pension tous les mois pour estudier, bien que l'Abbé nesoit, & n'ayt iamais esté tenu d'enuoyer aux estudess ses Nouices s'il ne veut, y ayant en l'Abbaye vn maistre expres gagé & entretenu par ledit Abbé, ainsi qu'il a tousiours esté, pour leur enseigner tout ce qui est necessaire pour la vie Reguliere; Et qui plus est, estant indubitable que ny les Nouices, ny les Profez, n'ont rien sur la Mèse Abbatiale, que ce qui leur a esté accordé par ses predecesseurs, & passé à Rome par sa Saincteté.

De toutes lesquelles choses ledit sieur de Selue faisant vn gros, ioignant les despens, interests, & amandes adiugés à Pistre, à Cornier, & Marquant Nouice, & autres de mesme estoife, non content d'auoir faict saisir au nom dudit sieur Cardinal, sur vne commission sur annee, tout le tiers de ses reuenus, qui estoient desia assez saisis par arrest, pour luy oster tout moyen de viure, & de venir se pouruoir, & se plaindre à vostre Maiesté, faict saisir & vendre tout le reste, met tous les meubles de son Abbaye à l'enchere, les vend tous iusques à la paillasse du liect, & iusques au crucifix de son oratoire, en plaine place, avec tout le vin & le bled qui se trouue dans la maison, avec tant d'animosité, qu'un Huissier Huguenot ne voulant vendre ledit crucifix, le sieur de Selue luy dit que c'estoit bon iour, Vendredy de Careme, & qu'il estoit de bonne vente. De la memoire des hommes, a t'on veu le moindre Prestre, non pas de mets, ains du monde, auoir esté traicté de la sorte, sans aucun subiect? Et pour couvrir ceste procedure, a supposé en sa sentéce cy ioincte, qu'il auoit decretté cete vente à la requisition dudit suppliant, par procuration à son Recepueur: Imposture sanglante, & insupportable!



Non content de ce, pour descouurir à plain iour le dessein dudit de Selue n'auoir esté autre, que de ruiner & porter à l'extreme necessité ledit suppliant, & à l'impossibilité de pouuoir se deffendre, ce qui surpasse toute immanité; apres auoir faisi, vendu, & dilapidé tout ce qu'il a trouué de son reuenu, & de ses meubles, il s'est efforcé d'empescher par toutes voyes extraordinaires, qu'il ne fut payé de ceux qui luy deuoiuent, mesme de ceux qui sont hors du pays messin. Et laissant à part plusieurs tels attentats, qui seroiēt ennuieux & infinsys a rapporter à vostre maiesté: Le suppliant auoit eu sentence aux Requestes du Palais, contre le sieur de la Verriere, pour les engagements detenus de son Abbaye, avec commandement à tous fermiers d'en vider leurs mains entre les siennes, mesme en vertu de ladite sentēce estoit en possession paisible, sans contredit de personne, il y auoit desja deux mois, auant ces entreprises, l'vn des engagements à Nourroy en Lorraine, l'autre à Tille en Allemagne, terre Regalienne, sur laquelle iamais aucun magistrat ny president de mets, ny aucun autre iuge que l'Abbé de saint Arnoul n'a rien eu à cognoistre: L'autre engagement à Resonuille, terre qui est aussi Regalienne du sieur Abbé de Goze, & les dismes de Flaigny, autre seigneurie de Francaloeud dudit suppliant. Voyant doncques qu'il ne pouuoit mordre là dessus, pour n'estre ces terres aucunement du pays messin, & partant que delà, le suppliant auroit, malgré luy, moyen de viure: Il suscita souz-main les souz-fermiers estrangers de s'adresser à luy, pour faire joindre les fermiers generaux dudit sieur de la Verriere, Bucellot, & de Villers du pays messin, signalez Huguenots, pour refuser ledit payement audit suppliant; mesme n'eut pas honte sur vn rapport verbal à luy fait par Bazaille, procureur du sieur de la Verriere disant, qu'il y auoit appel de ladicte sentence, bien qu'il n'en fit rien paroistre, de faire valloir ce rapport, comme vn appel, & par diuers arrests, commander ausdits fermiers generaux, d'interuenir à la cause: si bien que les reuenus dudit suppliant sont encore là, par son artifice; Et là où son Altesse, Prince souuerain, honora ladicte sentence des Requestes de vostre Palais de paris, accordant par vn beau placet, qu'en vertu d'icelle il entreroit en possession, comme il auoit fait, de Selue s'est porté si auant, que de  
passer



passer par dessus les sentences de vostre Parlement. Et voicy attachez ses attentats & ses sentences. En outre, pour mieux descouurer son fiel; Vn certain modera, Recepueur par cy-deuant de l'Abbaye de saint Arnoul, estoit encore fermier d'un tres-beau reuenu, situé hors du pays messin, dedans l'Euesché. Le suppliant plus d'un an durant, poursuiuit pardeuant ledit de Selue, ce recepueur, pour luy rendre compte, ce qu'il n'auoit peu obtenir, retenant cependant ledit Recepueur, la rente de deux ans qu'il debuoit, souz pretexte qu'il croyoit qu'en fin de compte il luy feroit deub: Le Procureur du suppliant presente requeste à de Selue, pour contraindre le Recepueur de ce qu'il doit de sa ferme, qu'on ne pouuoit faire venir à compte: Voila incontinent son autre sentence, que modera Recepueur, ne pourra estre contraint à payer sa ferme, qu'il n'ait esté ouy en ses comptes. Procedures si honteuses, que Grand Iâbe, le Greffier de la pretenduë Religiõ, a eu honte d'en donner coppie, & respondit qu'il ne pouuoit la bailler sans commandement expres dudit sieur de Selue.

De plus, il fist saisir le reuenu de Marueil, autre seigneurie, pour vne pretenduë debte des treze de mets, transportee à vn nommé le sieur du Menil, pour du Halt. En sorte que le suppliant voyant deperir tout son bien, & d'autre part, que la debte est imaginaire, & non deuë, presente requeste par son Procureur au sieur de Selue, que le bled & autres danrees saisies, soient deliurees à vn marchand qui en presentoit argent content, cõsentant que la somme seroit consignée au Greffe, iusques à l'eclaircissement de la debte. Arrest du Sieur de Selue, cy ioint, que tout sera vëdu par iustice, pour donner à disner à ses valets, qu'il appelle Huissiers, & à vil prix, & frustrant celuy qu'il disoit creancier. Et pour mieux couvrir la procedure, suppose en sa sentence cy-dessus ioincte, qu'il le fait souz la susdite requeste, laquelle ne tendoit pas à voir spolier toute sa maison, ains à la conseruer.

Et pour rien obmettre d'artifice pour accabler & ruiner ceste pauvre maison; parmy toutes ces extremitez, le suppliant fait faire vne assemblee de tout le Clergé, pour auoir leur adionction, opposition, & adistance contre ledit de Selue, & ses adherants, tout le Clergé s'y voyant grandement interessé, l'accorde: mais vn nommé Belchamps, Chanoine



estrange, lequel avec vn petit nombre d'autres estrangers, a tousiours fait en ce chapitre vne faction & vn monopole contre vostre authorité & seruice, dequoy vostre maiesté sera esclairee par monsieur d'Esperson, outre que ledit Beschamps est recogneu de tous, estre contraire, & singulierement ennemy du suppliant, qu'il a trauersé au fonds de son Abbaye, l'espace de trois ans, pour la faire tomber entre les mains d'un certain Flaigny estrange, dequoy vostre Conseil a eu ample cognoissance, lequel Beschamps, souz main s'introduit à dessein de nuire au suppliant, à presider audit Clergé, bien qu'il ne luy appartint pas, se fist donner la charge d'en porter la parolle audit de Selue, son familier, avec lequel il fit aller en fumee ladite adionction, contre l'intention & la volonté de tout le Clergé, & contre sa conscience.

Parmy tant de furieuses atteintes, qu'il n'estoit plus possible de supporter pour arrester le torrent, si faire ce pouuoit: le suppliant a recours au remede, que la nature, & toutes les loix humaines & diuines, ont donné aux oppressez contre les iuges passionnez, & ennemis des loix & de l'humanité, qui fust premierement de decliner, d'appeller, de protester contre le sieur de Selue, comme de iuge incompetant, avec protestation d'attentat, de nullité, & d'entreprise contre la maiesté & authorité du Roy, contre Dieu & contre l'Eglise: Le sieur de Selue auale tout, passe par dessus toutes les loix, & toutes cōsiderations. Ce qui occasionna en second lieu le suppliant, par nouuel acte en tout cas, sauf plus de cinquante causes de recusation, lesquelles il protesta vouloir, & debvoir seulement exposer pardeuant sa Maiesté, quand bien, ce qui est impossible, il seroit son iuge: mais luy pour couvrir son dessein, les fit iuger, sans auoir esté proposees par le maistre Escheuin, & les treze tous declinez, & incompetans comme luy, ou plus que luy, lesquels il appella tousiours à ses iugements, confondant vostre iustice, avec celle de ceux qui ne tachent qu'à l'abolir, ennemis, & parties formelles du suppliant, ainsi qu'il se verra cy-apres, ayant l'an passé plaidé contre eux, & encouru leur inimitié implacable, pour auoir maintenu ses droicts, en sorte que le maistre Escheuin maguin, coniuré avec ledit de Selue & les treze, mesprisant toutes les voyes de droict, & passant tousiours outre, auroient



porté le suppliant au dernier remede qu'ils abhorrent tous plus que la mort, à sçauoir, d'appeller de toutes ces procedures, à vostre Maiesté, reïterant par plusieurs fois ledict appel, duquel ils se sont tousiours iouiez, & porrez à la parfin à tel desespoir, qu'ayant le suppliant esté reduit à telle oppression, que dedans Mets il ne peust iamaïs trouuer aucun Notaire, qui voulut stipuler, ny aucun Procureur qui voulut parler, ny aucun Sergent ou Huissier qui voulut exploicter pour luy, pour les deffences expresses qui leur en auoient esté faictes: estant vray que parmy les infidelles mesmes, les iuges sont tenus de donner des Aduocats à ceux qui n'en ont point. Il fust contraint d'auoir recours à vn Notaire de ses subiects, pouuant stipuler en tout le pays Messin, nommé Mercier, pour recepuoir l'acte de ses recusations, declarations, signamment de son appel à vostre Maiesté, le faisant porter au Greffe dudit de Selue, par Nicolas Ferron, Recepueur general du suppliant. Et voicy comme ils les ont traictez. De Selue fait mettre prisonnier ledit mercier Notaire, où il le fait traicter avec toute rigueur, le condamne à faire amende honorable, le genoux en terre, la teste nuë, en son parquet, pour auoir receu ledit acte d'appel à vostre majesté, ordõne que ledit acte d'appel soit laceré publiquement à la veuë de tous, mesme cõdamne le Recepueur Ferron qui l'auoit porté au Greffe, à faire amende honorable, & les deux condamnez à de grosses amendes, & aux despens. Le tout executé, & mis en effect, tout de mesme: autre crime de leze maiesté, que tous les estrangers les plus incogneus, eussent eu horreur d'attenter, ayans seulement ouy nommer le Roy tres chrestien. Et voicy, SIRE, attachez lesdits actes d'appel, la sentence sur ce donnee, & tout ce qui s'en est ensuiuy.

Vne seule consolation restoit audit suppliant parmy ces oppressions, & horribles violences, vn Huissier de vostre Chastellet de Paris, Ionas Pinard recogneu pour homme de bien & experimenté au fait de sa charge, qu'il auroit mené exprès pour tesmoin assure de ses deportemens & des actions deses ennemis, & executeur de vos patentes de garde gardienne, suiuant leur forme, & autres sentences obtenues pour le desgagement de son Abbaye aux requestes de vostre Palais, lequel Pinard present tousiours à tout ce qui se passoit, de ce



requis, en vertu des lettres de garde gardienne, luy dresseoit de point en point des procez verbaux pour sa iustificatiō, icy attachez l'un apres l'autre, dequoy ayāt eu aduis ledit de Selue, desia honteux de ses actions, & le voyant descouvert a iamais avec ses attentats crians vengeance deuant Dieu; pour les couvrir, & de peur que le Soleil n'en rougist avec la posterité qui s'en estonnera & les detestera à iamais, voicy l'inuention qu'il mit en auant. Il suscita le susdit Pistre a se plaindre dudit Pinard, comme l'ayant iniurié lors qu'il fist ses insolences en la chambre Abbaticale en presence du suppliant, estant veritable en conscience que c'estoit au contraire Pistre qui auoit enormemēt iniurié & offensé ledit Pinard, si est-ce que sur la simple plainte, mesmes apres l'auoir ouy de sa bouche plus de deux heures durant & auoir esté exhibees les lettres d'ampliation fondees en edict d'exploiter en toutes les terres de lobeissance de vostre majesté, reseruant à son Conseil la cognoissance de tous les obstacles qui se presenteroient en la fonction de sa charge. De Selue, n'ayāt aucun esgard à tout cela, condamne par sentence cy ioincte ledit Pinard, a faire amende honorable audit Pistre, à l'amande & aux despens: declare tous ses procez verbaux nuls, luy iuge & partie, rache de le faire apprehender pour le contraindre à obeyr a sa volonté, ce qu'il eust fait, si ledit suppliant ne l'eust guarenty au. c foy, & voyāt ledit Pinard hors de sa puissance, s'en prend pour les despens & pretenduës amendes au recepueur dudit suppliant, & luy fait payer le tout montant a notable somme.

La cōiuration ne s'arreste pas la. Cornier duquel auons parlé tout en mesme tēps & coup, à coup s'efforce d'aneātir tout a fait toute la iurisdiction dudit Abbé de S. Arnoul suppliant, lequel ayāt enuoyé au iour de la feste pour représenter sa personne Hector le Cerf, son domestique, en vne sienne Seigneurie de la fondation de Pepin, nommee Marueil, ou il est seul Seigneur haut iusticier & Francaleud, y donnant grace sans contredict, & y iugeant sans appel: vn certain soldat de la Citadelle nuittamment vers la minuiēt, & à heure induē, foy disant auoir ie ne sçay quelle commission, qu'il n'auoit pas, de monsieur de Bonnourier, faisant leuer le maieur chef de sa iustice audit lieu, desia endormy, & ledit le Cerf qui l'allerent trouuer dedans la taruerne dudit lieu de ladicte Seigneurie,



gneurie, lequel le Cerf luy demandant à voir sa commission, au lieu de ce faire, le soldat luy veut ietter sur la teste vn pot d'estaing, & le poursuit à l'espee nuë iusque à la porte du logis, qu'il luy porte au ventre, le Cerf se trouuant sans espee, failly fortuitement d'vn pistoller qui n'estoit chargé d'aucune bale, le lache en l'air vers la porte pour intimider le soldat: la dessus le suppliant ordonne à ses iuges deux Docteurs fameux, le sieur Marhis, & le sieur Hordal professeur celebre en l'Vniuersité du Pontamausson proche de la, & de ses principales Seigneuries d'vne petite lieue, d'informer du faict pour en faire la iustice exacte & comme de raison. Quoy oyant le sieur de Bonnouurier, & le sieur de Selue, assemblent le maistre Escheuin, & les Treize en la Citadelle: lesquels ioints ensemble, d'autorité souueraine, declarent ledit Cornier desia ennemy & partie formelle d'ailleurs, iuge competant de cetaffaire nullement preuostable aduenue dedans la maison, & seigneurie du suppliant, avec deffences sur peine d'vne grosse amende d'en cognoistre, & à ses Iuges de passer outre en l'information commencée, Attentast duquel on ne pourra iamais donner vn seul exemple de tous les siecles passés, sur les terres des hauts iusticiers Regaliens de tout ce pays la. Si que Cornier heureux d'auoir trouué ce subiect de vengeance, fait faire a sa poste vne pretendue information, intimidant les tesmoins chose conuaincue par la contraire information que le suppliant nonobstant les susdites deffences a fait faire secretement pour conseruer son droit, & sur sadite pretendue information passe si auant ledit Cornier au dela de toute iustice, & raison, qu'il condamne ledit le Cerf par coutumace a l'estrapade, qu'il luy fait donner en peinture au milieu de la grande place du champ Passaille, qu'il fait peindre & habiller des couleurs dudit suppliant pour plus grande atrocité, bien qu'il ne les eut iamais portees: & par ce que ledit le Cerf estoit absent, Cornier armé de l'autorité & passion du sieur de Selue, se prend au pauvre maieur chef de sa iustice audit marueil, innocent de tout cela, aagé de plus de soixante quinze ans, lequel il fait prédre prisonnier, le traite tres-rigoureusement, & le detient iusqu'à ce qu'il ayt payé tous les despens & toutes les amendes, qu'il pretendoit auoir esté encourues par ledit le Cerf domestique du suppliant



qu'ils ont fait monter a plus de six cens liures. Vist-on iamais vne procedure semblable, & plus insupportable? Voicy attacheel l'information au vray du fait de Marueil, les pretenduës deffences du sieur de Bonnourier du sieur de Selue & du maistre Escheuin, contre la iurisdiction du suppliant. La pretenduë sentence dudit Cornier contre le Cerf, la plainte & & la ruine totale du pauvre vieillard son majeur de Marueil, avec tout ce qui s'en est ensuiuy.

Sur ces entrefaictes le suppliant a aduis que le sieur de Selue & son conseil ont conclud de le faire apprehender en son Chasteau de Buffiere, acharnez à le veoir en leur audiëce, & en leur puissance, pour souler leur passion non iamais plus ouye ce qu'il le contrainst de se retirer en Lorraine au Pont-Amousson, ou trois ou quatre fois, tout le Clergé de Mets s'est autrefois refugié, ainsi qu'il paroist par leurs histoires & Chroniques de leurs Euesques pour auoir esté oppressé, bien que plus legerement & en moindres occasions par les Treize de mets, ce qui leur a cousté par plusieurs fois la ruine totale de leur ville, & la coustera encore sans doute si vostre majesté de son autorité Royale ny met ordre. Outre que pres des deux tiers des reuenus de ladite Abbaye, sont dedans la Lorraine, ou dedans l'Euesché: qui fust la cause que son Altesse Prince tres-Catholique & debonaire, & monsieur de Vaudemont meux de compassion du traitement qu'on luy faisoit, luy firent cét honneur & ceste charité, luy escrire & luy offrir telle ville & place de leur souueraineté qu'il aymeroit mieux pour y viure en assurance, ce qu'il accepta, voyant vostre majesté, & son Conseil au voyage si esloigné, & tous les chemins impossibles & inaccessibles, & sur tout le voyant donné en proye, à ses ennemis par le sieur de Selue & de tous vos officiers, qui auoient expres commandement de vostre majesté de le proteger. Il se vient rendre au monastere du sieur Commandeur de saint Anthoine audit Pont-Amousson, qui le receut tres-charitablement, ou de rechef descourant par aduis certain que leur furiale entreprise estoit de le surprendre, & ledit Huissier Pinard, avec vne troupe de Carrabins pour estre la moytie de ladite ville de l'Eueché de Mets, il fut encore contrainct s'en retirer, & se rendre a Nancy, aupres de son Altesse, attendant l'occasion, de pouoir gagner Paris, & se ietter entre les bras



de vostre majesté. Surquoy ses ennemis firent courir à la Cour & à Paris, & presque par tout ce Royaume cōtre luy des faux bruits si estranges & barbares, qu'il a trouuez à son arriuee, que toutes les furies n'en eussent sceu forger de plus extrauagants complotants & apportants toute sorte d'artifice à sa ruine.

Et pour luy faire voir avec compassion, non pas le fonds de ces entreprises que le suppliant descouurira plainement à vostre majesté, mais les beaux pretextes que le sieur de Selue a eu de le mal-mener voyant le suppliant hors de ses mains, & croyant bien qu'il trouueroit iustice vers la clemence de vostre majesté, mesme qu'il mettoit en plain iour tout ce qui s'est passé: en presence de tesmoins tres-dignes de foy, luy fit escrire par vn Chanoine de la Cathedrale, voire apres l'enuoya expres à mesme fin au suppliant pour luy dire (comme il fit) auoir charge dudit sieur de Selue de l'asseurer que s'il se deportoit de la pension, qu'il deffendoit contre le sieur Cardinal de la Rochefoucault en vostre Conseil, que tout ce qui s'estoit passé iusques icy seroit estouffé, & qu'il luy faisoit bon de faire, que tous ses ennemis seroient ses amis. Aquoy il ne respondit autre chose sinon qu'on en estoit pardeuant vostre Conseil, & que iustice seroit faicte à qui il appartien-droit, & qu'il tenoit, cōme il fait, & a fait tousiours, ledit sieur Cardinal si homme de bien, & craignant Dieu, qu'il deteste-roit luy mesme la proposition du sieur de Selue, & qu'il estoit Prelat de telle reputation & conscience, qu'il ne pretendoit en tout ce different que la iustice & l'equité, de laquelle il fait, & a tousiours fait estat en toutes ses actions. Et est tres verita-ble que le mesme sieur de Selue plus de six mois auparauant ces affaires, auoit dit au suppliant & à autres personnes qua-lifiées qui le tesmoignerōt, qu'il luy auoit tousiours esté amy singulier, comme il auoit esté iusques alors, mais s'il poursui-uoit la pension contre ledit sieur Cardinal, que d'amy, il luy seroit ennemy, parole atroce & odieuse, ie ne dis pas en la bouche d'un iuge Chrestien, ains d'un qui n'auroit iamais ouy parler de Iesus Christ, ny de sa loy.

Le sieur de Selue deboutté de ceste euasion, par laquelle il esperoit estouffer la reueuë, & la memoire de tant de si enor-mes attentats, iouant de son reste, & mettant en arriere tou-



te consideration, & toute crainte de Dieu, sentant le suppliant en assurance de sa personne, & en chemin au plus fort de l'hyuer, de se venir ietter au pied de vostre maiesté pour luy demander iustice, & s'enuelopant de rechef aux horribles anathemes, & censures de l'Eglise, se mit à informer de sa vie, & meurs, mendiant de toutes parts sur l'etiquete des ennemis, voire des criminels & prisonniers du suppliant, vne cloaque de tesmoins intimidés, subornés, & subjugués à sa passion par argent, par bled, & autres voyes estranges, personnes les plus viles, abiectes, & infames de Mets, pour le charger de choses autant ridicules que calomnieuses, & atroces, & à veuë d'œil, fabuleuses: iusques à mettre en auant qu'il auroit dit en quelque colloque familier que messieurs les Princes auoient eu quelque occasion de faire ce qu'ils faisoient, ce qu'il a mis en auant pour veritable & pour crime de leze Majesté, pour donner à rire au grand nombre des ennemis de nostre foy, qui font plus de la grande moytié de la ville de Mets, voire; attentat extraordinaire: à la requisition & sollicitatiō du sieur Procureur Ioly, signalé entre tous ceux de la Religion pretenduë, ennemy irreconciliable reconnu de tous dudit suppliant, pour enseuelir & venger la memoire recente des conuersions signalees, & celebres de ceux de sa pretenduë Religion, & de la confusion qu'il a apportee à tous leurs ministres en ce pays là, inuention de l'ennemy de Dieu, & de son Eglise plutost que des refugiez de Mets qui ont persecuté a outrance, auant le suppliāt, d'autres predicateurs sujets & fidelles seruiteurs de vostre Maiesté, non pour autre sujet que pour auoir refuté a Mets les horribles blasphemés de Dupleffis Mornay contre la Messe, dequoy le sieur de saint Germain, aumosnier de feu monsieur, frere de vostre maiesté, qui est en cette Cour, & qui auoit fait en ladite ville des fruits tres-remarquables, sera bon tesmoin avec beaucoup d'autres. N'estant chose supportable que les forains qui n'ont peu compatir sous l'obeissance de leurs princes naturels, vetillent manger le pain de vos enfants, & naturels subiects, & les eloigner de vostre protectiō, de vostre seruice, & obeissance.

Sur ce, tout le Clergé de mets, bien que tard, & sans estre prié; mesme gouuerné, & conduit aujourd'huy par trois ou quatre estrangers, Chanoines du Chapitre de saint Estienne,

de tout



de tout temps ennemis de l'autorité de vostre maiesté, & contre les violences & oppressions desquels ledit suppliant plaide actuellement en Cour de Rome, neantmoins pressés de si pres par tels attentats, ouurent en fin les yeux, l'opposent en corps à ceste information : protestent contre luy de nullité & d'attentat. De Selue se ria & semoque de tout, & passe outre, rompant toutes les barrières de conscience, & de modestie chrestienne, avec horreur indicible de tous les bons Catholiques, fidelles tesmoins de toutes ces tragedies, & de tous les religieux les plus reformes, qui sont en grand nombre, lesquels tesmoins oculaires de ces actions si estranges, les detestent & abominent, pleurent & lamentent tous les iours, lançans leurs cris & leurs vœux au Ciel, les oppressions & persecutions du pauvre suppliant.

Non encore assouuy de ceste immanité, allant tousiours de mal en pis: & comme alteré de la ruine, & du sang du suppliant: le sieur de Selue, contre Dieu & conscience, fait vn extrait volant de ses pretenduës informations, qu'il a fait voltriger en ceste Cour, par la Lorraine & ailleurs, entre les mains de ses ennemis, en nombre incroyable, libelles diffamatoires, d'autant plus execrables, qu'ils sont contre vne personne publique & sacree, cogneüe en toutes les premieres chaires de France, en la profession de Predicateur ordinaire de vostre maiesté, avec vn degast inestimable de mille & mille ames, qu'il enuoppera en son crime, rendant la doctrine odieuse, mettant en proye son innocence aux ennemis de la foy: libelles emissaires d'une passion inhumaine, & barbare, & partant punissables de mort, suiuant toutes les loix diuines & humaines, estant chose non supportable, mesme entre les infideles, de communiquer les charges & informatiōs, quand bien elles seroient iuridiques, & legitimes, & non diaboliques, comme celles-cy, sinon en iustice, & en cas d'appel. En quoy il a vommy le plus espaix du fiel qui se puisse treuuer en vne ame soy disant Catholique, y adioustant vn decret & prinse de corps contre le suppliant, qu'il enuoya à Nancy à son Altesse, avec six ou sept carrabins, pour demāder pareatis, & l'apprehender pour le voir, sans appel, & sans remede, la proye de ses vengeances. Mais son Altesse Prince, craignant Dieu, & vray fils de l'Eglise, eut horreur de cette



impieté, les repoussa avec opprobre & honte. Ioint qu'il n'y auoit que quatre ou cinq iours que le suppliant estoit party de Nancy, & n'en eut aduis que par messager expres, de la part de ses grands & bons Princes tres-Catholiques, estant en chemin, & se trouuant en la ville de Dijon, lors du plus grand froid.

Et pour couvrir le poison plus dextrement, & faire croire à vostre Maiesté, que tous les Estats de mets consentoient à tel attentat, il trama avec le maistre Escheuin, ennemy iuré, comme dit est, du suppliant de faire assembler les trois Estats, pour escrire à vostre Maiesté contre luy. mais il est tres veritable que du Clergé, il ne peut iamais r'allier que trois de ses ennemis du Chapitre saint Estienne, Fois Doyen, Rossellety Official, Belchamps Archidiacre, & Fleustoft Chanoine de saint Thibault, Les quatre qui menent à Mets, à la veüe de tout le monde, la vie la plus scandaleuse, & les seuls auteurs de l'opposition, que trouua vostre Maiesté au fait de l'Euesché, contre vostre seruice & autorité, lesquels quatre ne sont que deux voix. Là où les deux Chapitres de saint Sauueur, & de saint Thibault, & les trois autres Abbayes de saint Benoit entieres, saint Vincent, saint Clement, S. Synphorien, & l'Abbaye du Pontifroy, & plus des deux tiers de la Cathedrale, avec tous les mendiants, Capucins, minimes, & autres, signeront tousiours pour le suppliant, & ne se voulurent iamais trouuer en ce monopole. De la Noblesse, il ne s'en treuua pas vn seul, qu'un Montigny huguenot remarquable: Du tiers Estat seulement, Ledit Maguin, & autres ses ennemis, peu en nombre, pas vn seul de la garnison. Pour la populace toute affectionnee, avec toute la garnison au suppliant, qu'il a long temps nourrie de sa doctrine, ils en firent vne grande assemblée, qu'ils exhortoient de crier, qu'ils vouloient qu'on escriuit contre luy à vostre Majesté: mais il ne s'en treuua vn seul qui le voulut dire, bien qu'on les en pressa de toutes parts.

Plus: cas estrange & incroyable, en vne ville de vostre obeissance, cuidant reduire le suppliant à l'extreme necessité, & hors de tous moyes, de se deffendre & de viure, le sieur de Selue s'est transporté si auant, que de mettre la main sur tous les biens du suppliant, empeschant ses intendants, & receueurs,



d'en auoir aucune cognoissance, & d'en rien recueillir, leur liant à tous les mains, & à tous les fermiers: mesme authorisant la sacrilege intrusion, & vsurpation de quelques Religieux, ses criminels atteints d'horribles excez, qu'il a enuenimé contre luy, & poussé à dilapider, & deuorer encore vne fois tous ses biens & reuenus. Cruauté sans exemple, & qui fait fremir tous les gens d'honneur & de bien, de l'ouir seulement.

Voila donc, SIRE, le suppliant Abbé de sainct Arnoul, mitré & croisé, apres auoir si chèrement soustenu son Abbaye & ses droicts, & ramené beaucoup de ses biens alienez; auourd'huy spolié & ruiné en tous les biens, assassiné & profané furieusement en son honneur, vexé molesté, & oppressé en ses seruiteurs, en ses subiects, en ses maisons, violé en la personne, avec telle precipitation & fureur, que toutes les susdites tragedies se passerent dedans l'espace d'un, ou de deux mois au plus. Et en sorte que le sieur de Selue se treuve conuaincu par luy-mesme, d'auoir contreuenue de poinct en poinct contre tous les chefs, sans en excepter vn seul, portez par les parentes solempnelles de garde gardienne de vostre maiesté, & de ses ancestres, expediees solempnellement en Chartre, & avec tout l'appareil d'autorité Royale, qu'il a violés, conculquées, profanées, & infamées, avec vn mespris non iamais plus leu, ny veu, de vostre couronne. Luy qui n'est qu'un petit commis en la iustice, pour les differents meuz entre les citoyens & soldats de Mets, atteint de toutes les censures, excommunications & maledictions Ecclesiastiques.

Or, SIRE, les iustes plaintes du suppliant seront suivies de mille & milles clameurs d'un nombre incroyable de ceux que de Selue a mal traitez en ce pays, qui gemissent souz son ioug, si vostre Maiesté tend vne fois les bras de sa clemence, & equité Royale au suppliant oppressé, le recepuant souz la protection speciale, que tous les predecesseurs, il y a plus de douze cens ans: mesme souz les Empereurs estrangers, ont tousiours trouuee tres-fauorable, presente, & paternelle. Voicy attachee vne ordonnance dudit sieur de Selue, par laquelle il faict deffences expressees à tous Aduocats, Procureurs, & autres, d'appeller à vostre maiesté, & à vostre Parlement. Il ne peut supporter qu'on appelle contre luy vers vostre Maiesté: on a



exposé cy-dessus qu'il a laceré en pleine audience l'acte d'appel dudict suppliant, ioinct à ses protestations, & fait faire au Notaire qui l'auoit passé, amende honorable. Il dit & escrit partout, qu'il n'est nullement inferieur à vos Parlements: Il persecute, & martyrise ceux qui y veulent maintenir vostre autorité: il foule aux pieds vos gardes gardiennes, c'est à dire, vostre sceptre & vostre Couronne. Il s'est marié à la fille d'un des treze; bien que plus retenu plus catholique, & plus zélé à vostre seruice queluy, espousant neantmoins en secondes nopces, à la veuë de tous vos fidelles subiects, les passions, & les interets des estrangers & refugiez, diametralement opposez à vostre souueraineté. Il se iouie de toutes les plaintes des pauures oppressez: il n'a autres facteurs, ou ageans de ses passions & violences, que des Huguenots & des estrangers, foulans aux pieds vos naturels subiets, & fidelles seruiteurs.

En vn mot, pour n'ennuyer vostre Maiesté, il est impossible deluy représenter ce qui en est. Le sieur de Selue ne peut ignorer auant que Henry deuxiesme eut recouuert Mets distraicte par laps de temps de vostre Couronne, que le pays & Esuesche de Mets, ne faisoient aucune difficulté d'aller par appel à Spire, voire ceux de l'Euesché y vont encore tous les iours, & ceux de la ville de Mets y alloient, il n'y a pas long tēps: ce que vostre Maiesté n'ayant peu, ny deub aucunement supporter, & ayant autant, & plus de droit sur Mets, que n'ont iamais eu les Empereurs: il n'y peut auoir personne, tant soit peu affectionnée à vostre seruice, qui ne iuge, & ne voye qu'il est beaucoup plus raisonnable que les appels viennent à vostre Maiesté, que non pas à Spire, voire infiniment plus commode, plus vtile, & plus honorable pour les subiets: à quoy neantmoins le sieur de Selue s'oppose plus que tous, pour fonder cette pretenduë souueraineté Acephale, & monstrueuse d'une Republique, sans chef independante (ce qu'elle n'a iamais esté) & de l'Empire & du Royaume, & partant de Dieu, que les Rois representent parmy les hommes: là où comme officier Royal, il deuoit s'efforcer de tout son pouuoir, & se tenir heureux d'y voir pleinement autorisée vostre Fleur de lis, & non pas d'y establir vne licence effrenée de contenter ses passions, & voyes de fait, aux despens des innocents, & vn desert escarté de vostre cognoissance, ou  
il seroit



il seroit loisible à chacun de donner ses passions pour des loix, & opprresser vos plus asseurez seruiteurs, sans pouuoir crier a son Roy, où vos naturels subiets seroiēt vexez & chassez, sans pouuoir se plaindre: où tous les biens, & tous les gens d'Eglise, chose prodigieuse, non iamais ouye en toute la Chrestienté, ny en tous les siecles ! Voire les Abbez les plus releuez, & sacrez, portans mitre & crosse, seroient à la mercy de tels iuges, & qui pis est, & qui fait horreur d'y penser seulement, des iuges de la pretenduë Religion, qui ne respirent que la ruine del'Eglise & des Ecclesiastiques: & en fin où les iuges seroient parties, voire ennemis iurez, ce qui n'a iamais esté ouy en aucune barbarie: s'engraisseroient des biens du suppliant, & si en voudroient estre les iuges.

Car, SIRE, la iustice de Mets est tellement composee, que des treze, qui est le magistrat, sans qu'ils s'en vse iamais autrement, la moitié précisément sont de la Religion pretenduë, comme aussi la moitié du Conseil du maistre Escheuin, mais en telle sorte que six huguenots, avec vn Catholique, suiuant leur pratique iournaliere, peuvent iuger, & determiner de tous procez, comme ils disent, en dernier ressort, & lesquels partant feront le procez à vn Prestre, à vn Chanoine, voire à vn Abbé, & pourquoy non à l'Euesque, qui n'est non plus priuilegié, ny exempt en ses terres, ny en sa personne, que l'Abbé de S. Arnoul aux siennes? Beaucoup plus encore iugeront ils des biens d'Eglise, les alieneront, & vsurperont à leur plaisir, ainsi qu'ils ont fait iusques icy, & le font tous les iours à la veuë de tous. Le tout sans appel & sans remede: comme il est indubitable, que plus de la grande moitié de ceux du magistrat & du Conseil de Mets, destiennent iniustement & impunément les biens & les terres de l'Abbaye de saint Arnoul, si que beaucoup d'entr'eux ne viuent d'autre chose, ainsi qu'il se verra au premier iour pardeuant vostre Maiesté, pour le recouurement d'iceux biens & terres: crainte & desespoir qui les a porté à toutes ces extremitez, & à joindre leurs interests, & vsurpations extraordinaires aux passions du sieur de Selue, voyants qu'il falloit lascher prise, & que le suppliant leur en auoit desia donné des grandes & viues secouffes. Quant au sieur de Selue, il n'a esté commis de vostre part, que sur les differents des soldats & citoyens, ainsi



qu'il appert par sa commission icy conioincte: de la memoire, de tous les hommes, on n'a iamais ouy dire qu'il ait iamais osé prendre cognoissance du moindre Chanoine de saint Estienne, qui ne sont ny si francs, ny si priuilegiez que saint Arnoul: non seulement cela, ains est chose inaudite, que iamais il ait osé entreprendre sur le moindre citoyen, ou crocheteur de mets, que de leur libre volonté: si bien que le moindre Sauetier messin sera plus priuilegié que l'Abbé de saint Arnoul: faut-il plus grand argument pour profiler le chaos de son estrange entreprise? D'ailleurs, ce qui est infiniment lamentable, tout le Conseil dudit de Selue est aussi en mesme sorte my Party, moitié huguenots, moitié Catholiques, hormis que le Procureur de vostre Maiesté, & son Greffier, Secrétaire, comme aussi le Greffier de la iustice des Treze sont tous huguenots, mesme appert par ses sentences pretendues, donnees contre le suppliant, qu'il a pris avec soy les sieurs Treze, & maistre Eescheuin, tels que ie viens de les qualifier huguenots, & ses parties formelles pour estre les iuges du suppliant.

Et est vray aussi, SIRE, que ceux de la Religion pretendue, ont des chambres myparties en vostre Royaume, mais tellement myparties quelles doiuent estre tousiours composees d'autant de Catholiques que d'autres en leurs iugemens, & non pas six huguenots, & vn Catholique comme a Mets, s'il leur plait, & ce qu'ils font tous les iours. Et si n'a on iamais ouy dire en tout ce Royaume, ny en aucun autre endroit de la Chrestienté, & de toute la terre habitable que les biens d'Eglise, & beaucoup moins, les personnes Ecclesiastiques soient iugeez par telles Chambres myparties, & par ceux de la contraire Religion hormis a Mets: ce qui seroit encore peut estre d'autant plus supportable, (estant vray que de ce party, & signamment à Mets, s'en trouuent des gens de bien, & qui ayment la iustice, & zelez a vostre seruice, & qui se sont monstrez, en ce fait plus humains que de Selue,) si du moins l'appel, & l'accés estoit libre à vostre Majesté, & à vostre Parlement, & si ce n'estoit vn monstre tres hideux, de voir les Prelats, & les biens de l'Eglise Catholique iugez, & mestrisez par les ennemis implacables de l'Eglise, & de Dieu, en quoy les ministres huguenots seroient plus heureux, plus frâcs, & plus priuilegiez,



lesquels on n'a iamais ouy auoir voulu subir le iugement des Prelats, ou iuges Catholiques, bien que malgré eux ils soient, & doiuent estre leurs pasteurs legitimes.

En fin SIRE, pour s'aquiter du serment qu'il doit a Dieu, & à vostre Maiesté, presté solennellement entre les mains de vostre grand Aumoinier de France, le suppliant proteste que si vostre Maiesté n'establyt a Mets, quelque autre forme de iustice Royale, dependente tout a fait & absolument de vostre parlement & de vostre Maiesté, & si elle y permet plus long-temps cette confusion de tant de souuerainetés, & iustices pesses-mesles, & esloigneez des rayons solaires de vostre Maiesté, & si ceux qui se trouueront auoir conculqué vostre autorité, & deprimé vostre majesté ne sont exemplairement chastiez pour la terreur des autres, sans doute ceste belle & grande ville frontiere, & importante periclite tout a fait de se perdre, soustenuë seulement iusques icy par la prouidence diuine, qui regarde plusieurs gens de bien qui y réstent encore, avec le soing, diligence & autorité des Gouverneurs, ioincte a l'inclination de tous les vrayes Messins toute portée à la fleur de Lys, & a vostre obeissance, de quoy le suppliant discharge sa conscience deuant Dieu, & vostre Maiesté: pouuant adiouter avec toute verité quelle y trouuera vn tres-grand nombre de ses fidelles seruiteurs qui embrasseront tres auidement, toutes les volonte, & qui ne respirent autre chose que d'y voir plainement & parfaictement la puissance Royale establie, gemissans sous les oppressions de ceste iustice tumultuaire, confuse, precipitée, & libertine. Et s'ils s'en trouuent qui veulent faire entendre autre chose pour intimider les Officiers, & ministres de vostre Conseil, ils ne sont pas seruiteurs de vostre Maiesté, & n'en sont pas si scauans que le suppliant, qui a vescu si long-temps avec eux, avec autant de passion à vostre seruice, qu'ils scauroient auoir. Toute ceste belle garnison fort Catholique tant les Chefs, que les soldats, sont de cœur & d'affection à vostre maiesté. La noblesse presque toute, à ce que i'en ay recognu, y est toute portée, & y a long-temps que vostre Conseil ne retentist que de leurs plaintes contre les Magistrats, & le sieur de Selue, qui les ont tousiours mal traittez, & oppressez leur droicts & iurisdicções à outrance. Dedans le Chapitre de saint Estienne, y en a eu



tousiours vn petit nombre de cinq ou six pour le plus estran-  
 gers, qui ont formé vne sourde faction contre vostre autho-  
 rité, se sont opposez a tout ce qui a concerné vostre seruice,  
 dequoy vostre maiesté a ressierty les effaits au besoin, de frai-  
 che, & recente memoire: & pour se mieux couvrir ont par  
 toute sortes d'artifice tousiours empesché, & empeschent  
 tous les iours l'aduancement de vostre seruice, & que vos na-  
 turels sujets ne trouuent place en leur Chapitre, & quand ils  
 s'y sont trouuez leur ont dressé mille embusches pour s'en  
 defaire, & pour les affliger. Pour à quoy paruenir, ils ont à  
 Rome des grandes correspondances, espient tous les benefi-  
 ces vacans, & par toutes voyes les font tomber aux mains de  
 estrangers, maquignons de benefices tres-aspres, qu'on des-  
 signera par nom, & surnom à vostre maiesté, & avec des exē-  
 ples tres-recents, & en grand nombre, qui seignent encore,  
 & seigneront long temps, si vostre maiesté n'y met bon or-  
 dre, cōme Henry le Grand, de glorieuse memoire auoit taf-  
 ché de le faire par vn Edit expres, qu'on a desia foulé aux pieds  
 mille fois, & mis au vent, quelque diligence que les Gouver-  
 neurs y ayent peu, & sceu apporter. Tant cette conspiration  
 est cachee, & couuerte, mais puissante. Hormis ceste petite  
 poignée de factieux estrangers, & mal affectionnés, le reste de  
 tout ce grand & venerable corps de la Cathedrale, plus des  
 deux tiers, & demy, avec tout le reste du Clergé, trois ou qua-  
 tre autres Abbayes, tout le venerable & deuot Chapitre de  
 saint Sauueur, & plus des deux tiers & demy, de celuy de  
 saint Thibaud sont assurez & affectionnés seruiteurs de  
 la fleur de Lys. Pour le commun du peuple & de la Bour-  
 geoisie, tous ceux presque qui sont originaires Messins ho-  
 norent de cœur vostre maiesté, & gemissent apres vostre au-  
 thorité, pour la voir parmy eux eternellement affermie, &  
 au rang qu'elle y merite, & ne se peut guere voir vn meil-  
 leur peuple, ny plus affectionné à vostre Couronne, n'estoit  
 l'infectiō & l'exhalaison pestiferé de ces esprits refugiez, & ra-  
 massez de diuerses nations: qui s'engraissent & s'enrichissent  
 du sang, & des impôts qu'il mettent sur pauvre peuple, sans  
 en rendre compte à personne du monde: & les conuiensēs  
 des Officiers, de vostre iustice qui y sont, qui infectent & cor-  
 rompent tout ce naturel messin. Dequoy ie puis, SIRE, parler à  
 vostre



• vostre maiesté, pour auoir prins peine, & fait estude particulier, par cōmandement tres-expres de feu Henry le Grand, vostre tres-honoré Pere, d'en descouurir ce qui estoit ncessaire pour vostre seruice.

**P** Artant, SIRE, le suppliant oppressé de toutes parts, supplie tres-humblement vostre Maiesté, qu'il luy plaise jeter l'œil de pitié, d'equité & de clemence sur luy, & sur sa maison desolee, les prenant singulierement, & à cet effect sous sa protection Royale, ainsi qu'ont fait tous vos ancestres, il y a plus de mille ans, & ordonner que toute les procedures, iugements, saisies, informations, bref, tout ce qui a esté fait, tāt par ledit de Selue, que les sieurs treze, le maistre Escheuin, le Preuost prouincial, & autres officiers à l'encontre du suppliant, seront cassés, annullés, bifs, & tirés de leurs registres. Et parce qu'on luy a dilapidé, sans aucune forme de iustice, plus de douze mille liures de sō reuenu, ordōner qu'auāt toutes choses, le tout luy soit restitué & restably en son entier & premier estat, ainsi qu'il est porté tres-expressement, & singulierement par sa garde gardienne. Ledit de Selue & Ioly, contraints à en respondre, & y satisfaire à leurs propres & priuez noms, par saisies de leurs biens, gages, & autres choses à eux appartenantes. Et parce que tous les iours se presentent grand nombre de difficultez vrgentes, touchant les susdictes choses, qui concernent le suppliant, & son Abbaye: & qu'il a beaucoup de procez entamez, pour le recouurement des biēs detenus, tant par lesdits sieurs treize, qu'autres du pays messin, en grand nombre; desquelles choses, & semblables, les susdits de Selue, & magistrat, ne peuuent cognoistre, estans iuges incompetans, & en outre les parties formelles, voire ennemis iurez & irreconciliables, ordonner que la cognoissance en appartiendra aux iuges assignez par les susdites gardes gardiennes, à sçauoir de Vitry, & autres, avec appel à vostre Parlement. Et cependant qu'adiournement personnel sera donné contre lesdits de Selue, & Ioly, pour se voir condamner à faire reparation d'honneur au suppliant, & leurs procedures en leur presence cassées & lacérées, & mises au neāt, avec assignation, tant audit de Selue, qu'au sieur Ioly vostre Procureur, maistre Escheuin, & Syndic des treze oppo-



fant (veu qu'il s'agit de vostre Couronne, & d'une garde gardienne) pardeuant vostre Parlement, pour se venir voir debouter contradictoirement par arrest solennel & inuiolable, de leur pretenduë souueraineté & iurisdiction, tant sur la ville de Mers, & pays Messin, en general, qu'en particulier, sur les biens, droicts, & personne del'Abbé de saint Arnoul, & sur ce, exhiber leurs pretendus priuileges, que vostre majesté trouuera estre subreptifs, & imaginaires: ensemble de se voir condamner à souffrir la susdicte garde gardienne, suiuant sa forme & teneur, à faire toutes reparations deuës & raisonnables audit suppliant, tant pecuniaires de douze mille liures d'amende, qu'autres peines, selon l'exigence de tels attentats, contre l'autorité de vostre majesté: & contraints de restituer & reestabliir les choses iniustement detenues, & à reparer tous & chacuns les susdicts attentats, & tous autres, suruenus du depuis, avec despens, dommages & interests. Quoy faisant vostre Majesté, fera iustice: & comme second fondateur, relevant l'Abbaye de saint Arnoul, vostre grand ayeul, de la totale ruine, obligera toute ceste pauvre maison desolee, & son Abbé suppliant, d'adresser sans cesse leurs vœux au Ciel vers le Dieu tout puissant, le Roy des Rois, le protecteur & vengeur des oppressez, pour l'entiere prosperité de sa personne, de sa Couronne, & de ses Royaumes.





